

2 Mi por lesa

Un museo di i pa mucha

'Kiko boso ta pensa si nos ban habri un museo den nos barío?' Maite ta puntra su amigunan. Tur mucha ta bira entusiasma mesora. Siman pasá nan a bai un museo ku skol i e ekskurshon ei a hasi hopi impreshon. 'Ki sorto di museo bo ke habri?' Kimi ta puntra kurioso. 'Un museo di i pa mucha,' Maite ta bisa desidido. 'E idea ta bon, pero kiko nos ta bai pone den e museo?' Kimi ta bolbe puntra. 'Ko'i hunga,' Maite ta bisa ku un smail grandi. 'No ko'i hunga ku bo por kumpra den pakus, pero ko'i hunga di ántes. Nos por bai kana den barío i puntra tur hende kiko nan tin ku por pone den nos museo.'

'Tremendo idea!' Aròn ta bisa. 'Laga nos bai mesora, ya nos no ta perdè tempu. Kuant'or nos mester ta bèk?' 'Sink'or,' Maite ta kontestá.

Aròn ta bai derechitu serka su tawela. E sa ku tawela tin algun ko'i hunga di ántes wardá. 'Papachi, Papachi,' e ta grita ora e basha kareda dreña kas di tawela leng'afó. 'Papachi, nos ta bai habri un museo di ko'i hunga. Awor nos tur tin ku kolekshoná ko'i hunga di ántes. Papachi por yuda mi? Papachi tin algun kos di ántes wardá, n' ta bèrdè?'

'Hepa, wanta, ban ku kalmu, yònkuman. No t'asin'asina e kos ei ta bai no,' tawela ta bisa. 'Mi tin algun ko'i hunga di ántes wardá sí, pero mi no ke pa nan kibra.' Spantá Aròn ta wak tawela. 'Papachi,' e ta bisa poko kònfús, 'masha ten mi no

sa kibra kos. Lo mi pèkurá pa nada no pasa tawela su ko'i hunganan di ántes.' Tawela ta wak Aròn un ratu. Kaba e ta lanta. Ku un kara un tiki misterioso e ta habri e kashi grandi den sala. For di un lachi e ta saka dos kahita. 'At'akí mi yu,' e ta bisa. 'Ta mi Dinky Toys. Kuida nan bon!'

'Dinky Toys?' Aròn ta puntra asombrá, 'kiko esei ta, Papachi?' 'E marka tòp di outo di hunga di ántes,' tawela ta splika. Ku kuidou Aròn ta habri e kahitanan. E ta mira dos outo luluis luluis. 'Danki, Papachi!' e ta grita kontentu i e ta duna tawela un brasa fuerte. Tawela ta sonrei. Kaba e ta bisa: 'Mi ta deseá boso masha éksito ku boso museo.'

Aròn ta keda un ratu mas serka tawela, pero sink'or en punto e ta bèk serka Maite.

Tin un baiben di otro mundu na kas di Maite. Mas i mas mucha ta dreña kurá ku ko'i hunga di ántes. Tin pòpchi den wig antik, kas di pòpchi, kaha ku blòki di palu, djèks, hupel, tròm, yoyo, kabai di zoya, kahita ku tur sorto di kuarteto, trein antik i tur sorto di wega di mesa. 'Yee,' Maite ta grita ora e delaster mucha a pone su ko'i hunga riba mesa den veranda. 'Nos tin basta opheto pa habri nos museo di ko'i hunga.' 'Yee,' e otro muchanan tambe ta grita, miéntras nan ta bati man.

Ta Aròn so no ta bati man. Despues di e aplouso e ta bisa pokopoko: 'Mi tin un pregunta sí, ta unda nos ta bai traha nos museo?'

Mesora ta reina un silencio profundo. Konsterná e muchanan ta wak otro. Está

bobo ku nan no a pensa riba un lugá. Ta kon ta hasi awor? Nèt na e momentu ei mama ta kana bin. Su boka ta kai habri ora e mira tur e kosnan di hunga. Ma na mes momentu e ta ripará ku tur mucha ta wak desesperá i un tiki tristu. Preokupá e ta puntra: 'Ta kiko a pasa, muchanan? Boso parse hende ku a haña un mal notisia.'

E ora ei Maite ta konta mama di nan plan. 'I awor nos no tin lugá pa nos museo,' e ta kaba su storia. 'Laga mi pensa,' mama ta murmurá ku un ploisina grandi riba su frenta. Yen

di speransa e muchanan ta wak e. Despues di un ratu mama su kara ta klara. 'Mi sa kaba na unda boso por traha boso museo,' e ta bisa. 'Na sentro di barío tin un sala bashí ainda. Kiko boso ta pensa di e idea di tene e eksposishon aya?'

'Esei ta un bon plan!' tur mucha ta grita kontentu. 'Biba nos museo di ko'i hunga!'

Mes atardi tur ko'i hunga ta bai sentro di barío. Aya tur hende di barío ta bai admirá loke e muchanan a kolekshoná. Ku e museo ta un éksito rotundo, esei no ta kos di papia mes.



3 Bo a komprendé?

- Lesa e teksto huntu ku bo grupo.
- Bo a komprendé e teksto?

Pregunta

1. Kiko ta tópiko di e teksto akí?
2. Ken ta e protagonista(nan) den e kuenta akí? Maite so, Aròn so, Maite i Aròn òf mama so?
3. Ki sorto di museo Maite ke traha?
4. Na unda e muchanan ke bai kolekshoná opheto pa nan museo?

5. Dikon Aròn ta bai serka su tawela?
6. Kiko tawela ta bisa Aròn ora e dun'é e dos kahitanan?
7. Aròn ta kontentu ku loke tawela ta dun'é? Splika bo kontesta.
8. Ki sorto di ko'i hunga e otro muchanan ta trese?
9. Dikon Aròn no ta bati man?
10. Kiko mama ta proponé?
11. E museo a bira un éksito? Splika bo kontesta.

